

摘藻堂四庫全書薈要

經部

欽定四庫全書蒼要卷一千八百八十一

經部

周禮注疏卷二十八

漢鄭氏注

唐陸德明音義

賈公彥疏

夏官司馬第四

惟王建國辨方正位體國經野設官分職以為民極乃
立夏官司馬使帥其屬而掌邦政以佐王平邦國注政
正也政所以正不正者也孝經說曰政者正也正德名

以行道疏

注釋曰為正者取平正之義大司馬主六軍所以正諸侯違王命不正者故鄭云所以正

不正是以康子問政孔子云子帥以正孰敢不正孝經說者是孝經緯文云政者正也正德名以行道者亦是正者先自正己之德名以行道則天下自然正引之以證正不正之事

政官之屬大司馬

卿一人小司馬中大夫二人軍司馬下大夫四人輿司馬上士八人行司馬中士十有六人旅下士三十有二人府六人史十有六人胥三十有二人徒三百有二十人注輿衆也行謂軍行列晉作六軍而有三行取名於

此音義

輿音餘行戶剛反注同行行列也

疏

釋曰此序官從大司馬至府六人其數與諸官同自

史以下則異諸官皆云史十二人胥十二人徒百二十人獨此官史十有六人胥三十二人徒三百二十人與

諸官異者以大司馬大總六軍軍事尚嚴特須監察故
胥徒獨多是以襄公三年六月晉悼公會諸侯盟于雞
澤秋晉侯之弟揚干亂行於曲梁魏絳戮其僕晉侯怒
對曰使臣斯司馬臣聞師衆以順為武是其尚嚴也注
釋曰與衆者按左氏傳僖二十八年晉侯聽與人之誦
是與為衆之義也云行謂軍行列者詩云寘彼周行是
行得為行列云晉作六軍而有三行取名於此者左氏
僖二十八年云晉侯作三行以禦狄注云晉置上中下
三軍今復增置三行避天子六軍之名以所加三軍
者謂之三行彼名軍為行取於此行司馬之名也 凡

制軍萬有二千五百人為軍王六軍大國三軍次國二
軍小國一軍軍將皆命卿二千有五百人為師師帥皆
中大夫五百人為旅旅帥皆下大夫百人為卒卒長皆

上士二十五人為兩兩司馬皆中士五人為伍伍皆有
長注軍師旅卒兩伍皆衆名也伍一比兩一間卒一族
旅一黨師一州軍一鄉家所出一人將帥長司馬者其
師吏也言軍將皆命卿則凡軍帥不特置選於六官六
鄉之吏自卿以下德任者使兼官焉鄭司農云王六軍
大國三軍次國二軍小國一軍故春秋傳有大國次國
小國又曰成國不過半天子之軍周為六軍諸侯之大
者三軍可也詩大雅常武曰赫赫明明王命卿士南仲

大祖大師皇父整我六師以修我戎既倣既戒惠此南
國大雅文王曰周王于邁六師及之此周為六軍之見
于經也春秋傳曰王使虢公命曲沃伯以一軍為晉侯
此小國一軍之見于傳也百人為卒二十五人為兩故

春秋傳曰廣有一卒卒偏之兩音義

軍將子匠反凡軍將將帥之類放此

帥所類反下將帥之字皆同卒子忽反後皆同卒長丁
丈反卷內不出者放此比毗志反大祖音泰下大師及
下文大僕同皇父音甫倣本亦作敬
京領反見賢遍反下同廣光浪反

疏釋曰云此大國
以命數同者軍數則同則上公為大國侯伯為次國子
男為小國也魯是侯爵而魯頌云公徒三萬注云萬二

千五百人為軍大國三軍合三萬七千五百人言三萬者舉成數也然當公之時其實二軍故襄公十一年作三軍則前無三軍矣若僖公時有三軍則中間應有舍文詩言為三軍者作詩之人舉魯盛時而言若然魯公伯禽之時則三軍矣魯語季武子為三軍叔孫昭子曰不可又云今我小侯也明大侯之時有三軍矣鄭荅林碩為三萬之大數者以實言之也此言軍將皆命卿及師帥皆中大夫旅帥皆下大夫卒長皆上士兩司馬皆中士伍皆有長者皆據在鄉為鄉大夫州長黨正族師閭胥比長時尊卑命數而言伍皆有長是比長下士不言皆下士者以衆多官卑故略而不言也注釋曰鄭以經伍兩卒旅師軍皆據在鄉內民數而言者以其凡出軍皆據六鄉為數是以小司徒云凡起徒役無過家一人是以鄭據在鄉之數而以家出一人結之也鄭云言凡軍將皆命卿則凡軍帥不特置選於六官六鄉之吏者鄭言選於六官者謂王朝六卿此六軍之將還選六

卿中有武者為軍將也又別言六鄉之吏者據六鄉大夫及州長黨正族師閭胥比長中有武者今出軍之時還遣在鄉所管之長為軍吏也鄭必知還遣本長為軍吏者見管子云因內政寄軍令且經竝據在鄉時尊卑而言故知因遣其鄉之官而領之也是以州長職注云掌其戒令賞罰則是於軍因為師帥自黨已下注皆云因為旅帥因為卒長閭胥以下雖不言因為義可知又云自卿以下德任者使兼官焉者按大司馬云師都載旃鄉遂載物鄭云鄉遂大夫或載旃或載物衆屬軍吏無所將則自卿已下至伍長有武德堪任為軍之吏者乃兼官兼官者在鄉為鄉官在軍為軍吏若無武德不堪任為軍吏者則衆屬他軍吏身不得為軍吏是無所將也是以詩云韎韐有奭以作六師鄭云諸侯世子除三年之喪未遇爵命服士服而來時有征伐之事天子以其賢任為軍將是代為軍將之事則王朝之官有武德者皆可代為軍吏也先鄭云王六軍已下復引諸文

者以當時有不信周禮者故引為證言春秋有大國有次國有小國者此非春秋正文成三年冬十一月晉侯使荀庚來聘衛侯使孫良夫來聘公問諸臧宣叔曰中行伯之於晉其位在三孫子之於衛也位為上卿將誰先對曰次國之上卿當大國之中中當其下下當其上大夫小國之上卿當大國之下卿中當其上大夫下當其下大夫上下如是古之制也衛在晉不得為次國晉為盟主其將先之丙午盟晉丁未盟衛蓋指此為大國次國小國也云又曰成國不過半天子之軍周為六軍諸侯之大者三軍可也者襄十四年晉侯舍新軍禮也成國禮不過半天子之軍周為六軍諸侯之大者三軍可也晉雖為侯爵以其為霸主得置三軍故為禮也云此周為六軍之見于經也者此引春秋及大雅常武與文王皆是正經故云之見于經也此經言軍而詩云師者此皆軍也故鄭答林碩云軍者兵之大名軍禮重言軍為其大悉故春秋之兵雖有累萬之衆皆稱師詩云

六師即六軍也。然軍旅卒兩皆衆名，獨舉師者。按易師
象云：師貞丈人吉，无咎。軍二千五百人，為師丈之言。長
也。以法度為人之長，故吉。无咎，謂天子諸侯而主軍軍
將皆命卿。天子六軍兵衆之名移矣。正言師者出兵而
多以軍為名次，以師名少旅為名。言衆舉中言之也。由
此言之，故以師為大名，不言軍為其大。悉不言旅為其
中。故以師表名，見其得中。以兼上下言多，以軍為名，謂
征伐次以師為名，謂君行師從少以旅為名，謂卿行旅
從之時也。云春秋傳曰：王使虢公命曲沃伯以一軍為
晉侯。此小國一軍之見於傳者。莊十六年傳文以其新
并晉國，雖為侯爵，以小國軍法命之。故一軍也。云故春
秋傳曰：廣有一卒。卒偏之兩者，宣十二年欒武子說楚
之軍法云：其君之戎分為二，廣服氏云左右廣各十五
乘，廣有一卒。服氏云百人為卒，言廣有一卒為承也。卒
偏之兩，服氏云五十人曰偏，二十五人曰兩。廣既有一
卒為承，承有偏，偏有兩，故曰卒偏之兩，引之以證卒是

百人兩為二十五人意也

一軍則二府六史胥十人徒百人

疏釋曰此非

常也有軍則置之無則已府史不言府二人史六人而逆言其數者欲見所置非常故倒言以見義也

司勳上士二人下士四人府二人史四人胥二人徒二

十人注故書勳作勳鄭司農云勳讀為勳勳功也此官

主功賞故曰掌六鄉賞地之法以等其功音義

勳香云反劉音

訓疏

釋曰此已下六十官以大司馬主軍法所有軍事及武勇官爵賞賚整齊之等皆屬焉序官前後亦

不據尊卑直取事急者居前事緩者居後是以司勳及馬質已下皆士官而居前射人諸子司士之等大夫官而居後也但司馬主征伐軍無賞士不往凡軍以賞為先故僖二十八年秋七月晉文公獻俘授馘飲至大賞

武王入殷封功臣謀士師尚父為首故司勳列位在前
上士二人為官下士四人為之佐府二人主藏文書史
四人作文書草胥二人為什長徒二十人給徭役注釋
曰先鄭不從古書勳而從勳者勳是古字從今之勳也
云掌六鄉賞地之法以
等其功者司勳職文

馬質中士二人府一人史二人賈四人徒八人注質平

也主買馬平其大小之賈直音義

賈音嫁注及下同

疏

釋曰司馬者主

以供軍之用馬質主平馬賈買之故亦列職居前也然
不使與校人相近而在此者平馬大小賈直故使與量
人相近也以其主
司馬故屬夏官

量人下士二人府一人史四人徒八人注量猶度也謂

以丈尺度地音義

量音亮或音良下同度待洛反下同

疏

釋曰在此者以其掌營軍之壘

舍量其市朝州塗軍社之所里其中雖有餘事要以軍事為重故亦列職於此也

小子下士二人史一人徒八人注小子主祭祀之小事

疏

釋曰在此者以其職有掌小祭祀羞羊肆釁軍器師田掌斬牲徇陳之事故屬此也

羊人下士二人史一人賈二人徒八人疏

釋曰羊人在此者以其職

有掌羊牲又祭祀割牲等之事羊屬南方火司馬火官故在此按說卦云兌為羊注云其畜好剛鹵又易說云大山失金雞西嶽亡玉羊玉羊者西嶽之精而羊不在西方者羊有二義按五行傳云視之不明則有羊禍注云羊畜之遠視者屬視故列在夏官兌為羊又屬西方也

司燿下士二人徒六人注故書燿為焦杜子春云焦當

為燿書亦或為燿燿為私火玄謂燿讀如子若觀火之

觀今燕俗名湯熱為觀則燿火謂熱火與音義燿古喚
反焦哉

約反季又音灼觀古疏釋曰在此者按其職有行火之
喚反下同與音餘政令火屬南方故在此也注釋

曰子春不從古書燿還從燿燿為私火者民間理爨之
火為私火亦如後鄭為熱火也後鄭讀如子若觀火者
盤庚告其羣臣不欲從而匿情者子若觀熱也我有刑
罰如熱火可畏故引燕俗以湯熱為觀亦取熱火之義
後鄭云謂熱火與者對秋官司烜氏以夫燧取火於日
中為明者為冷火破字為疑故云與也孔安國以觀為
視我觀汝情如視火與鄭義異也若然司
烜氏不在此者彼取金義故在秋官也

掌固上士二人下士八人府二人史四人胥四人徒四

十人注固國所依阻者也國曰固野曰險易曰王公設

險以守其國疏

注釋曰鄭云固國所依阻者也者欲見固據在國而言云國曰固野曰險者對

下文司險是在野之義也以其掌固職云掌脩城郭溝池樹渠之固竝據國而言司險職云周知山林川澤之阻而達其道路皆據在野而言故知在野曰險又引易者易坎卦象云天險不可升地險山川丘陵王公設險以守其國引之證固是在國王公設之以守國若然易云王公設險險即此固以其言王公設之非是在野自然之險者是對文則險固異散則險固通名也掌固司險在此者取整齊之義故也

司險中士二人下士四人史二人徒四十人

掌疆中士八人史四人胥十有六人徒百有六十六人注

疆界也音義

疆居良反疏注及後同

疏

釋曰在此者按其職闕雖未知其事蓋掌守疆界亦是禁

戒之事故在此也

候人上士六人下士十有二人史六人徒百有二十八

注候候迎賓客之來者疏

釋曰在此者案其職云各掌其方之道治與其禁令以設

候人是候迎賓客之事故詩云彼候人兮荷戈與袂亦是武事故在此也

環人下士六人史二人徒十有二人注環猶卻也以勇

力卻敵音義

環戶關反劉戶串反卻起略反下同

疏

釋曰在此者按其職云掌致師察軍慝皆

是軍師之事
故在此也

挈壺氏下士六人史二人徒十有二人注挈讀如絜髮

之絜壺盛水器也世主挈壺水以為漏音義

挈劉苦結反一音結

又戶結反
盛音成

疏

釋曰在此者按其職云掌挈壺以令軍井挈轡以令舍挈卷以令糧又云凡軍事懸

壺以序聚櫟皆為軍事故在此也注釋曰鄭讀挈如絜髮之絜者詩云總角之晏毛傳云總角結髮此鄭依毛傳絜即結之義也鄭云世主挈壺水以為漏者以其稱氏此則官有世功則以官為氏故以世主解之也

射人下大夫二人上士四人下士八人府二人史四人

胥二人徒二十人疏

釋曰在此者以其主射事射即武事故在此也

服不氏下士一人徒四人注服不服不服之獸者疏

釋曰

在此者以其服不服之獸象王者伐叛柔服之義故在此也

射鳥氏下士一人徒四人音義

射食亦反

疏

釋曰在此者按其職云掌射鳥

亦是武事在此宜也

羅氏下士一人徒八人注能以羅罔搏鳥者郊特牲曰

大羅氏天子之掌鳥獸者音義

搏音博一音付本又作捕音步

疏

釋曰在此

者按其職云掌羅鳥羅亦是武事故在此也注釋曰引郊特牲云大羅氏天子之掌鳥獸者按彼云大羅氏天子之掌鳥獸者諸侯貢屬焉彼大羅氏與此羅氏為一彼稱大對諸侯此直曰羅氏無所對故不稱大此職唯

羅鳥不主獸彼兼言獸者諸侯所
貢鳥獸屬焉則兼掌所貢之獸也

掌畜下士二人史二人胥二人徒二十人注畜謂斂而

養之音義

畜許六反注同劉許又反

疏

釋曰在此者按其職云掌養鳥而阜蕃教擾之是專養鳥

其職注謂鷩鷩之屬是斂而養之鳥是羽蟲屬南方故在此也

司士下大夫二人中士六人下士十有二人府二人史

四人胥四人徒四十人疏

釋曰在此者以其職云掌以德詔爵以功詔祿與大司馬

云進賢興功同故列職於此也

諸子下大夫二人中士四人府二人史二人胥二人徒

二十人注諸子主公卿大夫士之子者或曰庶子疏

釋曰

在此者按其職云若有甲兵之事則授之車甲故亦在此也注釋曰鄭云諸子主公卿大夫士之子者按其職云掌國子之倅倅副代父者是公卿大夫士之適子皆是倅故鄭歷言之云或曰庶子者按禮記燕義稱此諸子為庶子故言或曰以其燕禮有庶子執燭之事彼稱諸子謂之庶子故燕義兼說天子諸子之事諸庶為一皆掌公卿大夫士之適故通謂之庶子也

司右上士二人下士四人府四人史四人胥八人徒八

十人注右謂有勇力之士充王車右疏

釋曰在此者王車之右執干戈

以衛王亦是武事故在此也注釋曰鄭知勇力者其職云國之勇力之士能用五兵者屬焉鄭云選右當於中

是用勇力
充之者也

虎賁氏下大夫二人中士十有二人府二人史八人胥

八十人虎士八百人注不言徒曰虎士則虎士徒之選

有勇力者音義

賁音奔下同

疏

釋曰在此者亦衛守王在此宜也注釋曰鄭云不言徒曰

虎士則虎士徒之選有勇力者以其在胥下例皆是徒今不言徒而曰虎士明先是徒之選有勇力者乃為之

以當徒處

旅賁氏中士二人下士十有六人史二人徒八人疏

釋曰

在此者按其職云掌執戈盾夾王車而趨左八人右八人車止則持輪言旅見其衆言賁見其勇亦是衛守王

事故在此也

節服氏下士八人徒四人注世為王節所衣服音義

于為

偽疏釋曰在此者按其職云郊祀二人執戈送逆尸從反車亦是武事故在此也注釋曰鄭云世為王節所衣服者以其著服與王為節而稱氏故知官有世功則曰官族然凡稱氏者鄭雖不釋為世功但注有詳略從可知也

方相氏狂夫四人注方相猶言放想可畏怖之貌音義

放方丈反本疏釋曰在此者按其職云蒙熊皮黃金四或作旒音同目玄衣朱裳執戈揚盾可畏怖亦是武事故在此也注釋曰鄭云方相猶言放想者漢時有此語是可畏怖之貌故云方相也

大僕下大夫二人小臣上士四人祭僕中士六人御僕

下士十有二人府二人史四人胥二人徒二十人注僕

侍御於尊者之名大僕其長也疏

釋曰在此者凡言僕御者是武衛之事又

太僕職凡軍旅田役贊王鼓故凡僕御皆連類在此也
太僕已下四官因仍同府史之等者太僕已下至御僕
乃是別職同官故同府史也小臣其職云掌王之小命
詔相王之小法儀祭僕其職云掌受命於王以視祭祀
御僕其職云掌羣吏之逆及庶民之復太僕為長故連
類在此若然府史胥徒在御僕下者是四官別職同官
故共府史胥徒也

隸僕下士二人府一人史二人胥四人徒四十人注此

吏而曰隸以其事褻音義

褻息列反

疏

釋曰在此者以僕皆在此故亦在此但所

掌事褻故別官職不屬太僕注釋曰鄭云此吏而曰隸以其事褻者此經言下士二人即是吏按秋官有罪隸已下是奴稱隸以其掌褻故與賤同稱隸也

弁師下士二人工四人史二人徒四人注弁者古冠之

大稱委貌緇布曰冠音義

弁皮彥反稱尺證反

疏

釋曰在此者以夏物長大而盛

壯人年長大乃冠以象夏故不同司服在春官而在此也注釋曰按禮記郊特牲及士冠記皆云夏收殷尋周弁三代皆祭冠則弁亦冕也即是六冕皆得稱弁若然皮弁爵弁自然是弁故鄭云弁者古冠之大稱也云委貌緇布曰冠者此二者對皮弁爵弁六冕惟曰冠若散文亦得言弁故司服云凡田冠弁服凶事服弁服皆得

言弁也

司甲下大夫二人中士八人府四人史八人胥八人徒

八十人注甲今之鎧也司甲兵戈盾官之長音義

鎧苦愛反

盾常允反又音允

疏

釋曰在此者其職雖闕但甲者軍師所用在此宜也注釋曰言甲今之鎧者今古用

物不同其名亦異古用皮謂之甲今用金謂之鎧從金為字也云司甲兵戈盾官之長者以其此官下大夫又

在上已下皆士官故云長也

司兵中士四人府二人史四人胥二人徒二十人疏

釋曰

在此者按其職云掌五兵五盾及授兵從司馬之法此亦為軍事在此宜也

司戈盾下士二人府一人史二人徒四人注戈今時句

子戟音義

句古侯反
子音結

疏

釋曰在此者按其職云祭祀授旅賁父故士戈盾授舞者兵皆

武事故在此也注釋曰按冬官冶氏為戈戟戈則兩刃長六尺六寸戟則三刃長丈六尺形既不同鄭云戈句

子戟而為一物解之者鄭舉漢法以況之漢時見戈有旁出者為句子亦名胡子故號戈為句子戟也

司弓矢下大夫二人中士八人府四人史八人胥八人

徒八十人注司弓矢弓弩矢箛官之長音義

箛音服

疏

釋曰

在此者按其職云掌六弓四弩八矢給武之所用在此宜也注釋曰云司弓矢弓弩矢箛官之長者司弓矢下大夫已下繕人橐人皆士官故得與之為長也鄭云司弓弩即繕人也

繕人上士二人下士四人府一人史二人胥二人徒二

十人注繕之言勁也善也疏

釋曰在此者按其職云掌王之用弓弩矢箛亦是武

事故在此也注釋曰云繕之言勁也善也者以其所掌弓弩有堅勁而善堪為王用者乃入繕人以共王故鄭為此解之也

橐人中士四人府二人史四人胥二人徒二十人注鄭

司農云橐讀為芻橐之橐箭幹謂之橐此官主弓弩箭

矢故謂之橐人音義

橐古老反幹如字沈古旱反

疏

釋曰在此者按其職云掌六弓

八矢四弩是軍事所用故在此也注釋曰先鄭云箭幹謂之橐按冬官矢人云以其筈厚為之羽深後鄭云筈

讀為橐謂矢幹古文假借字則此橐人非直掌矢橐兼主弓弩矢箛等而云橐人者以橐為主耳故云此官主弓弩箭矢故謂之橐人

戎右中大夫二人上士二人注右者參乘此充戎路之

右田獵亦為之右焉音義

乘繩

疏

釋曰

此戎右并下僕駟在此者皆是防衛

之官故皆在此注釋曰云右者參乘者若在軍為元帥則將居鼓下將在中御者在左若凡平兵車則射者左御者居中若在國則尊者左御者亦中央其右是勇力之士執干戈常在左右故云右者參乘也云此充戎路之右田獵亦為之右者按巾車王路有五按下文僕亦有五惟此戎右已下有三不見玉路祀之右又不見木路田路之右者以田戎相類齊祀相因故以類相兼故戎右兼田右齊右兼祀右若然僕有五不兼者僕雖

於右是以六藝之中有五御而不言右也按巾車玉路居前戎路在後此右在前又戎右中大夫齊右下大夫道右上士戎右官又尊者夏官主事尚威武故戎右居前使官尊也

齊右下大夫二人注充玉路金路之右音義

齊側皆反下齊僕并

注疏注釋曰充金路為主故云齊按曲禮云立如齊注齊謂祭祀時則齊雖施於祭前當祭時亦名齊故得兼金玉二路而鄭不言亦以其齊同故也

道右上士二人注充象路之右疏

釋曰在朝所以行道是以名車為道車以

巾車五路差之上已有玉金革木之等此道右當充象路之右可知不兼而官卑者以其上四事行事簡故使兼此道右日日視朝行事繁故不兼以其事卑於齊戎之等故官職卑也

大馭中大夫二人注馭之最尊音義

馭音疏 御者亦是衛

守之事在此宜也注釋曰云馭之最尊者以其御玉路以祀故云最尊以是特尊不與下同名僕而謂之大馭也若然戎右在前尚威武此大馭在前者以其僕雖駕馭為難仍非武事故退戎僕於後進大馭於前也仍尊戎僕在齊僕之上而使中大夫為之與戎右尊卑同也

戎僕中大夫二人注馭言僕者此亦侍御於車疏

注釋曰上

太僕已下言僕並是侍御之官稱僕今此馭車之人亦言僕者在車亦是侍御之類故云亦侍御於車也

齊僕下大夫二人注古者王將朝覲會同必齊所以敬

宗廟及神明音義

朝直遙反後朝覲皆同

疏

注釋曰齊而敬神明者按曲禮下注云春

夏受贄於朝受享於廟秋冬一受之於廟是朝覲敬宗廟按覲禮及司儀會同之時設方明於壇上設六玉以禮方明之神是會同敬神明中車云金路建大旂以賓則金路主為賓路賓路則諸侯與王行朝覲會同之禮故鄭以朝覲會同釋齊也

道僕上士十有二人注王朝朝莫夕主御王以與諸臣

行先王之道音義

朝朝上如字下直遙反莫音暮

疏

釋曰按上齊右已下至齊僕皆二人

唯戎右與道僕人數多者則戎右有所斬殺故左氏傳晉縛秦囚萊駒為右使萊駒斬之故人多也道僕所以特多者以朝夕在朝來往駕脫難而且煩故人多也注釋曰鄭云王朝朝莫夕主御者此釋人多之意云王以與諸臣行先王之道者此釋稱道之言也

田僕上士十有二人注

釋曰人亦多者王有四時之田兼有園圍遊獵及取鮮獸之等

亦是事繁而難故亦特多也

馭夫中士二十人下士四十人疏

釋曰按其職云掌馭貳車從車使車之等

馭僕之類故亦在此馭夫總六十人按校人三乘為阜卓一趣馬三卓為繫繫一馭夫則馬三十六匹一馭夫計良二千一百六十匹則六十馭夫又駕六麗一師六師一趣馬六趣馬一馭夫則一馭夫主四百三十二匹駕千二百九十六匹則馭夫三人并前六十三人與此不合者蓋此序官脫三人也

校人中大夫二人上士四人下士十有六人府四人史八人胥八人徒八十人注校之為言校也主馬者必仍

校視之校人馬官之長音義

校戶教反字從木若從手旁作是比校之字耳今人

多亂之注校之校人同

疏

釋曰在此者以馬共軍所用故其職云凡軍事物馬而頒之故在此官特尊而

多者以王馬多故也注釋曰云校之為言校也者讀從曲禮與少儀效馬效羊取效見義以其養官畜者必效見之故鄭云主馬者必仍校視之仍者相仍有時數數程見之也云校人馬官之長者與下趣馬至圉人為長有事皆取長官法度

趣馬下士阜一人徒四人注趣馬趣養馬者也鄭司農

說以詩曰蹶維趣馬音義

趣七口反劉清須反注同阜才早反趣養清須反又七口

反一音七句反蹶居衛反疏釋曰在此者按其職云掌正良馬而齊其飲食是以鄭云趣馬趣養馬者故在

此也注釋曰先鄭說以詩云蹶維趣馬者彼詩是刺幽王之詩其時臣名蹶惟作趣馬之官權寵之例引以證趣馬是官名也

巫馬下士二人醫四人府一人史二人賈二人徒二十人注巫馬知馬祖先牧馬社馬步之神者馬疾若有犯

馬則知之是以使與醫同職疏

釋曰巫知馬崇醫知馬病故連類在此也有賈

者治馬死生須知馬價故有賈人也注釋曰馬祖之等並在下文有人犯者與為崇巫則知之為之謝過必與醫同職者巫言無祟則是時氣及損傷付醫治之故二官同職也

牧師下士四人胥四人徒四十人注主牧放馬而養之

音義

牧舊音目劉音茂沈音木

疏

釋曰在此者按其職云掌牧地是放馬故與校人連類在此也

庾人下士閑二人史二人徒二十人注庾之言數也音

義

庾所求反數色主反數之同

疏

釋曰在此者按其職云掌十有二閑之政阜馬佚特之等故與馬官

連類在此也

圉師乘一人徒二人圉人良馬匹一人駑馬麗一人注

養馬曰圉四馬為乘良善也麗耦也音義

圉魚呂反乘繩證反注同

麗如疏

釋曰在此者以其掌養馬也圉人在此者按其職云掌養馬芻牧之事以役圉師亦是為馬故

亦連類在此也

職方氏中大夫四人下大夫八人中士十有六人府四人史十有六人胥十有六人徒百有六十人注職主也

主四方之職貢者職方氏主四方官之長

疏釋曰在此者司馬主

九畿職方制其貢事相成故在此官尊而人多以其主天下人民貢賦之事事繁故也注釋曰云主四方官之長者與下諸言方者為長也

土方氏上士五人下士十人府二人史五人胥五人徒

五十人注土方氏主四方邦國之土地

疏釋曰在此者按其職云以

土地相宅而建邦國都鄙與職方連類在此也故主四方邦國之土地

懷方氏中士八人府四人史四人胥四人徒四十人注

懷來也主來四方之民及其物疏

釋曰在此者按其職云掌來遠方之民致

方貢致遠物故與職方連類在此也

合方氏中士八人府四人史四人胥四人徒四十人注

合方氏主合同四方之事疏

釋曰在此者按其職云掌達天下之道路通其財利

同其數器故注云主合同四方之事故亦連類在此也

訓方氏中士四人府四人史四人胥四人徒四十人注

訓道也主教道四方之民音義

道音導下同

疏

釋曰在此者按其職云掌

道四方之政事與其上下之志誦四方之傳
道故注云教導四方之民故連類在此也

形方氏中士四人府四人史四人胥四人徒四十人注

形方氏主制四方邦國之形體疏

釋曰在此者按其職云掌制邦國之地域

而正其封疆故注云主制四方邦國之形體故連類在此也

山師中士二人下士四人府二人史四人胥四人徒四

十人疏

釋曰在此者按其職云掌山林之名辨其物與其利害而頒之于邦國使致其珍異之物按王

制云名山大澤不以封故天子立山師以遙掌之使貢故與職方亦連類在此也

川師中士二人下士四人府二人史四人胥四人徒四

十人疏

釋曰在此者按其職與山師同故亦連類在此

遼師中士四人下士八人府四人史八人胥八人徒八

十人注遼地之廣平者音義

遼音原

疏

釋曰在此者按其職云掌四方之地

名辨其丘陵墳行原隰之名故連類在此也注釋曰云遼地之廣平者爾雅文也

匡人中士四人史四人徒八人注匡正也主正諸侯以

法則疏

釋曰在此者按其職云掌達法則匡邦國而觀其愚使無敢反側以聽王命注云主正諸侯以

法則故連類在此也

禫人中士四人史四人徒八人注禫人主禫序王意以

語天下音義

揮他南反與探同語魚據反

疏

釋曰在此者按其職云掌誦王志道國之政事

以巡天下之邦國而語之故注云主揮序王意以語天下故連類在此也

都司馬每都上士二人中士四人下士八人府二人史

八人胥八人徒八十人注都王子弟所封及三公采地

也司馬主其軍賦疏

釋曰言每都上士二人已下者此王自以臣為司馬遙掌都內故其

職云掌都之士庶子及其衆庶車馬兵甲之戒令聽於國司馬既是軍故在此也注釋曰鄭據何知都惟有王子弟所封及三公采地不通卿大夫者案司裘云諸侯則共熊侯豹侯卿大夫則共麋侯卿不入諸侯之中故知義然云司馬主其軍賦者即司馬法云成出士十人徒二十人之等竝是都司馬所主也

家司馬各使其臣以正於公司馬注家卿大夫采地正猶聽也公司馬國司馬也卿大夫之采地王不特置司馬各自使其家臣為司馬主其地之軍賦往聽政於王

之司馬王之司馬其以王命來有事則曰國司馬疏

注釋

曰云家卿大夫采地者接載師職家邑任稍地謂大夫采地小都任聽地謂卿之采地大都任疆地謂三公采地則卿入小都中今此經直言家而小都入家中不在上都中者司馬主軍事嚴凝為主須辨尊卑故依司裘卿與大夫不得稱諸侯者為家又不使王臣為之也若然都宗人家宗人及都士家士皆使王臣為之者都家宗人有祖王之廟九皇六十四氏王所當祭故使王臣為之都家之士以獄訟刑罪王政之重非王臣不決故

亦使王臣為之但非嚴凝故卿入都耳云王之司馬其
以王命來有事則曰國司馬者其職云以聽於國司馬
對此從下向上
則曰公司馬

周禮注疏卷二十八

周禮注疏卷二十八考證

凡軍制卒長皆上士二十五人為兩○石經上士下作
二十有五人當從之又注卒一族族監本訛作旅今
改正

疏是以州長職注云掌其戒令賞罰則是於軍因為
師帥○監本脫則是於軍因為師七字今考州長注
補之

節服氏疏故知官有世功則曰官族○族監本訛旅今

据左傳改正

大馭疏此大馭在前者○大馭監本訛戎僕今據下文
云退戎僕於後進大馭於前改正之

趣馬下士阜一人徒四人○下士無員數疑有脫文以
立政與虎賁綴衣並列推之未必即以皂為下士也

周禮注疏卷二十八考證

謹案卷二十七第八頁前八行金路無錫刊本錫
訛錫今改

第二十八頁後二行旌旗之細者也刊本旗訛旃
據鄭注改

第二十九頁後五行疏諸侯建旂刊本旂訛旗今
改

第三十四頁後五行疏春秋文二年刊本春秋訛
左傳今改

卷二十八第三頁後四行疏三萬之大數刊本三

說二今改

第五頁前四行疏多以軍為名刊本多訛軍今改
第九頁前二行伐叛柔服之義刊本伐訛伏據毛

本改


第十二頁後八行疏箭幹謂之彙刊本幹字脫據

毛本增

第二十頁前四行注及三公采地也刊本公字下

衍衆字據毛本刪





覆校官編修臣劉種之

校對官編修臣李光雲

謄錄舉人臣張慎和

欽定四庫全書薈要

經部

周禮注疏卷二十九



欽定四庫全書薈要卷一千八百八十二 經部

周禮注疏卷二十九

漢鄭氏注 唐陸德明音義 賈公彥疏

馬之職掌建邦國之九灋以佐王平邦國注平成

也疏

釋曰此九灋已下皆言邦國則施於諸侯為主故云邦國也云以佐王平邦國者九灋以

糾察諸侯使之成正故以平言之也但此九灋據殷同之時建之故大行人云殷同以施天下之政注云政謂邦國之九灋則殷同之時制畿封國以正邦國注封謂司馬明布告之故云建也

立封於疆為界音義

畿音

疏

釋曰謂制諸侯五百四百里之等各有封疆界分乃

得正故云以正邦國設儀辨位以等邦國注儀謂諸侯及諸臣之

儀辨別也別尊卑之位音義

別彼列反下皆同

疏

注釋曰鄭知儀中有諸侯

及諸臣者以此經云等邦國按大行人云以九儀辨諸侯之命等諸臣之爵鄭云九儀謂命者五公侯伯子男也爵者四孤卿大夫士也知九儀中唯有諸侯諸臣無天子之臣者按大宗伯云以九儀之命正邦國之位注云每命異儀則九儀之中謂一命以至九命之儀其進中有六命八命并九命作伯兼有王臣則與此異也

賢興功以作邦國注興猶舉也作起也起其勸善樂業

之心使不惰廢音義

樂如字又音洛一音五教反

疏

釋曰進賢謂臣舊在位有德行

者在草萊有德行未遇爵命者進之使稱才任用興舉也臣有功者舉之亦使任用作起也以臣有賢有功舉

與之官則起邦國之內勸善樂業之心使不惰廢善業也**建牧立監以維邦國注牧**

州牧也監監一國謂君也維猶連結也音義

監古街反疏釋

二百一十國以為州州有牧使維持諸侯又一國立一監以監察一國上下相維故云以維邦國也此則太宰

云建其牧立**制軍詰禁以糾邦國注詰猶窮治也糾猶其監亦一也**

正也音義

詰去吉反疏釋曰制軍者按上文大國三軍次國二軍小國一軍詰禁者按士師有五

禁天子禮此諸侯國亦當有五禁以相窮治相糾正故云以糾邦國**施貢分職以任邦國**

注職謂賦稅也任猶事也事以其力之所堪疏

釋曰施貢多少

據國地大小故地官大國貢半次國三之一小國四之一皆由天子施之此大宰九貢并小行人春令入貢皆

是歲之常貢與大行人因朝而貢者異也分職者即太宰所云九職是也彼據畿內此據諸侯諸侯邦國亦由天子分之使民有職業因使稅之所稅者市之以充貢若然言貢據向天子而言云稅據民所為為說事相因皆所以任邦國故

簡稽鄉民以用邦國注簡謂比數之

稽猶計也音義

鄉許亮反疏釋曰注云簡謂比數之稽猶計也謂比數計會鄉民而用之故

云以用邦國也均守平則以安邦國注諸侯有土地者均之尊

者守大卑者守小則法也疏

釋曰言均守謂五等諸侯有五等受地五百里已下

是均守也平則者則法也謂五等職貢之比小事大以

等皆有常法則邦國獲安故云以安邦國

和邦國注比猶親使大國親小國小國事大國相合和

也易比象曰先王以建萬國親諸侯音義

比毗志反注同

疏

注釋

曰按司儀有五等諸侯自相爲賓亦有五等諸侯之臣相爲國客按春秋有小國朝大國大國聘小國故鄭云使大國親小國釋經比小也云小國事大國釋經事大使相合和故云以和邦國也引易比象者其卦坤下坎上坤爲土坎爲水水得土而流土得水而柔是水土和合故象先王建萬國親諸侯謂法卦卦行事使諸侯相親引之者證比以九伐之灋正邦國注諸侯有違王命則小事大之義

出兵以征伐之所以正之也諸侯之於國如樹木之有

根本是以言伐云音義

伐如字劉扶發反

疏

注釋曰鄭云諸侯有違王命則出兵

以征伐之所以正之也者此經與下文爲目則下九者皆是違王命者也若然按下文九者唯有賊賢害民一

者稱伐其餘八者皆不言伐此經總言伐者侵滅二者亦是伐之例其餘六者皆先以兵加其境服乃青之墀之削之正之殘之杜之故皆以伐言之云諸侯之於國如樹木之有根本是以言伐云者按月令孟夏云無伐大樹孔子云伐一木不以其時非孝子是樹木稱伐此九伐施於邦國在於時會之時是以大行人云時會以發四方之禁注云禁謂九伐之法是當時會者也

馮弱犯寡則青之注馮猶乘

陵也言不字小而侵侮之青猶人青瘦也王霸記曰四

面削其地音義

馮皮冰反青所景反瘦所又反疏注釋曰云馮弱據以

大侵小如此者青瘦其地使不得强大也引王霸記者其記王及霸事者云四面削其地者對下文削之者不四面削之
為異也 賊賢害民則伐之注春秋傳曰粗者曰侵精

者曰伐又曰有鐘鼓曰伐則伐者兵入其竟鳴鐘鼓以

往所以聲其罪音義

粗音麤本亦作麤竟音境

疏

洋釋曰云賊賢者亂王所任任同已

者如此則賊虐諫輔故云賊賢也云害民者以君臣俱惡重賦多徭其民被害故曰害民如此者則聲鐘鼓伐之也引春秋傳者按莊十年二月公侵宋公羊傳曰猶者曰侵猶者曰伐何休云猶麤也彼不言麤此言麤者鄭讀傳與何異猶即麤義亦同也又曰有鐘鼓曰伐者此莊二十九年夏鄭人侵許左氏傳曰凡師有鐘鼓曰伐無曰侵引此二者皆證侵輕伐重之義也

暴內陵外則壇之注內謂其國

外謂諸侯壇讀如同墠之墠王霸記曰置之空墠之地

鄭司農云壇讀從憚之以威之憚書亦或爲墠玄謂置

之空墀以出其君更立其次賢者音義

壇依注作墀音善憚之以徒旦

反下同本疏

釋曰暴內即上云賊賢害民是也陵外即上云馮弱犯寡是也上二文各有其一故

伐之膏之不奪其位此則外內之惡兼有故壇之奪其位立其次賢注釋曰鄭云讀如同墀之墀從金滕三壇同墀之墀取其除地曰墀謂置之空地先鄭讀從憚之以威之憚此罪既重而直憚之於義不可故後鄭還從王霸記爲正鄭知立其次賢者以其古者不滅國故知更立次已下賢子弟

野荒民散則削

之注荒蕪也田不治民不附削其地明其不能有音義

蕪音

疏

釋曰古者量地以置邑度地以居民地邑民居必參相得無曠土無遊民今言野荒民散由君

政惡民竝適彼樂國故民散而野荒是其君不能有故削之

負固不服則侵之注負

猶恃也固險可依以固者也不服不事大也侵之者兵

加其竟而已用兵淺者詩曰密人不恭敢距大邦疏

釋曰

謂倚恃險固不服事大國則以兵侵之使弱其勢也注
釋曰云固險可依以固者也者謂若僖四年楚屈完云
楚國方城以為城漢水以為池雖君之衆無所用之是
其負固不服也云不服不事大即上云比小事大是其
服者也云用兵淺者對伐是用兵深者以其罪輕直
侵之而已也詩云者大雅皇矣篇引之者證不服也

賊

殺其親則正之注正之者執而治其罪王霸記曰正殺

之也春秋僖二十八年冬晉人執衛侯歸之于京師坐

殺其弟叔武音義

坐才

疏

注釋曰鄭云正之者執而治

其罪者其正未必即是殺但

賊殺其親其罪尤重故以正為殺解之是以王霸記以
 正為殺也引晉人執衛侯歸於京師京師據洛邑而言
 也云坐殺其弟叔武者按彼傳晉侯伐衛衛侯出奔楚
 晉侯敗楚於城濮其弟以受盟既受盟國則無罪衛侯
 即入將入與弟叔武為期衛侯先期入叔武將沐聞君
 至喜捉髮走出前驅獻犬射而殺之衛侯知其無罪枕
 之股而哭之元咺舊在國是叔武黨見衛侯殺弟遂訴
 衛侯於晉晉以衛侯有罪諸侯不相治罪遂執衛侯歸
 於京師時使醫行醢衛侯甯俞貨醫行
 薄其醢不死是坐殺弟合正之事也

放弑其君則殘

之注放逐也殘殺也王霸記曰殘滅其為惡音義

又弑本
 作

殺同音試疏注釋曰鄭以逐解放則若季氏逐昭公之類是
 也鄭雖不解弑弑其君則若慶父弑二君及崔

杼弑君之類是也鄭云殘殺者以殺解殘也經本不云
 殺不云滅云殘者蓋取殘賊殺之殺之苦毒故尚書梓

材云戕敗人宥注戕殘也又云無胥戕無胥虐注云無相殘賊無相暴虐是戕爲殘賊也異義鄭君以爲左氏宣十八年秋七月邾人戕鄆子於鄆傳曰凡自內虐其君曰弑自外曰戕戕即邾人戕鄆子是也自內弑其君曰弑者晉人弑其君州蒲是也雖他國君不加虐亦曰殺若加虐殺之乃謂之戕之取殘賊之意也若自上殺下及兩下自相殺之等皆曰殺若然此經云殘者是加虐殺之雖非他國君至於賊臣亦云殘也

犯命

陵政則杜之注令猶命也王霸記曰犯命者違命也陵

政者輕政灋不循也杜之者杜塞使不得與鄰國交通

疏注釋曰鄭訓命爲命者欲就王霸記之命解之爲王命之意也但犯命陵政是不受上命不通之事故還

杜塞之使不與四鄰交通外內亂鳥獸行則滅之注王霸記曰悖人

倫外內無以異於禽獸不可親百姓則誅滅去之也曲

禮曰夫唯禽獸無禮故父子聚麀音義

行下孟反悖必內反去起呂反

夫音符麀於

疏

注釋曰外亂謂淫於外若齊襄公魯桓牛反牝鹿也夫人文姜之等是也內亂謂家內若衛

宣公上烝父妾下納子妻之等是也引曲禮者鹿之父

子聚麀獸之亂不言鳥之亂義可知故畧而不言也按

春秋公羊左氏說凡征戰有六等謂侵戰伐圍入滅用

兵麀猶不聲鐘鼓入境而已謂之侵侵而不服則戰之

謂兩陳交刃戰而不服則伐之謂用兵精而聲鐘鼓伐

而不服則圍之謂弔其四郭圍而不服則入之謂入其

四郭取人民不有其地入而不服則滅之謂取其君

此皆舉重而言假令先入後滅書入舉重已外盡然

月之吉始和布政于邦國都鄙乃縣政象之灋于象魏

正

使萬民觀政象挾日而斂之注以正月朔日布王政於

天下至正歲又縣政灋之書挾日十日也音義

縣音玄注同始

直史反挾

疏

釋曰正月謂周正建子之月之吉謂朔日始和凡政有故言始和者若改造云耳布

政於邦國都鄙者謂上九灋九伐并下凡命以下皆此時布之邦國據畿外都鄙據畿內不言鄉遂及公邑布政可知此則徧天下也云乃縣以下亦謂正歲乃縣之一與大宰同不復具釋也乃以九畿之

籍施邦國之政職方千里曰國畿其外方五百里曰侯

畿又其外方五百里曰甸畿又其外方五百里曰男畿

又其外方五百里曰采畿又其外方五百里曰衛畿又

其外方五百里曰蠻畿又其外方五百里曰夷畿又其
外方五百里曰鎮畿又其外方五百里曰蕃畿注畿猶
限也自王城以外五千里爲界有分限者九籍其禮差
之書也政職所共王政之職謂賦稅也故書畿爲近鄭
司農云近當言畿春秋傳曰天子一畿列國一同詩殷
頌曰邦畿千里維民所止音義

分符問反共音恭凡
供字皆作共後倣此疏

釋曰乃以九畿之籍者謂以面五千里爲九畿皆有典
籍之書今大司馬以此籍書施其政職之事於邦國諸
侯也云方千里曰國畿者此據王畿內千里而言非九
畿之畿但九畿以此國畿爲本向外每五百里加爲一

畿也云侯者侯也爲天子伺侯非常也云甸者爲天子
治田以出賦貢云男者任也任王者之職事云采者采
取美物以共天子云衛者爲天子衛守云蠻者縻也以
近夷狄縻繫之以政教自此以上六服是中國之九州
自此已外是夷狄之諸侯此蠻服與大司徒云要服亦
一也言要者亦見要束以文教也云夷者以夷狄而得
夷稱也云鎮者蓋中國稍遠理須鎮守云蕃者以其最
遠故得蕃屏之稱此三服總號蕃服故大行人云九州
之外謂之蕃國世一見指此三服也此九者衛服之內
各舉一邊而言其實通稱唯蠻服以外直據彼爲號不
通中國之言也注釋曰云王城以外五千里爲界者兩
面相距則方萬里此則易之一君二民之地若然堯舜
之時固應萬里而五服面二千五百里兩面相距止有
五千里無萬里者此據未治洪水時服各五百里至禹
治洪水之後弼成五服服加五百則亦萬里若孔君義
則不然若據鳥飛直路此周之九服亦止五千若隨山

川屈曲則禹貢亦萬里彼此不異也云九籍其禮差之書也者諸侯賦貢多少有常則大國貢半次國三之一小國四之一是其禮差也云政職所共王政之職謂賦稅也者按大宰云以九職任萬民據畿內此九職亦施與邦國則此政職也但施職事與之使萬民勤職而出賦稅諸侯得之以半與三之一四之一一市取土毛以貢之則禹貢篚貢是也據民而出謂之賦稅據諸侯所送謂之貢也引春秋傳者按襄二十五年鄭子產對晉云昔天子之地一圻列國一同今大國多數圻矣若無侵小何以至焉殷頌邦畿千里是殷頌玄鳥詩之言引此二者證王畿

凡令賦以地與民制之上地食者參之二

其民可用者家三人中地食者半其民可用者二家五人下地食者參之一其民可用者家二人注賦給軍用

者也令邦國之賦亦以地之美惡民之衆寡爲制如六
遂矣鄭司農云上地謂肥美田也食者參之二假令一
家有三頃歲種二頃休其一頃下地食者參之一田薄

惡者所休多音義

命力疏釋曰此文承上邦國之下而呈反疏云令賦是還據邦國諸侯而

說也此經有三等之地按小司徒注云有夫有婦然後
爲家自二人以至於十人爲九等七六五者爲其中則
地有上中下各分爲三等九等則十口食上上九口食
上中八口食上下七人食中上六人食中中五人食中
下四人食下上三人食下中二人食下下又按遂人上
地夫一廛田百晦菜五十晦中地家二百晦下地家三
百晦與此上地食者參之二合故鄭云邦國如六遂矣
若然則上地是上下之地應家八人一人爲家長可任

者當云家七人今云家三人者經欲互舉以明義故以
中地之上家七人見出上地之下八人者明亦有上地
之中上地之上又言下地食者參之一其民可用者家
二人地即據下地之上人即據中地之下家五人者亦
是互舉以明義故地舉其下人舉其中欲見亦有下內
三等其地及人也先鄭云食者參之二假令一家有三
頃歲種二頃休其一頃者舉上地只應云一項五十畝
而云三頃者直取參之二舉整言之或并二家而說也

中春教振旅司馬以旗致民平列陳如戰之陳注以旗

者立旗期民於其下也兵者守國之備孔子曰以不教
民戰是謂棄之兵者凶事不可空設因蒐狩而習之凡
師出曰治兵入曰振旅皆習戰也四時各教民以其一

馬春習振旅兵入收衆專於農平猶正也音義

中音仲
下放此

陳直觀反下之陳可陳陳前徇陳行疏注釋曰鄭云以
陳巡陳皆同餘以意求之蒐所留反疏旗者立旗期民
於其下也者謂大司馬素有田獵之期日今至期日立
熊虎之旗於期處以集衆故云期民於其下云兵者守
國之備者鄭欲解田獵者所以習兵故云兵是守國之
備引孔子語欲見須田獵以教戰云兵者凶事者隱公
傳文云不可空設因蒐狩而習之者蒐狩是田獵之名
欲行蒐狩先芟草萊教戰訖乃入防田獵故云因蒐狩
而習之是以書傳文戰鬪不可空習故於蒐狩以闕之
闕之者習之是其習兵因蒐狩也云凡師出曰治兵入
曰振旅皆習戰者按莊公八年正月師次於郎甲午祠
兵公羊傳曰祠兵者何出曰祠兵注云禮兵不徒使故
將出兵必祠於近郊陳兵習戰殺牲饗士卒又曰入曰
振旅其禮一也皆習戰也左氏說治兵於廟禮也注云

三年而治兵與秋同名兵革將出故曰治兵穀梁傳亦云出曰治兵習戰也入曰振旅習戰也鄭玄於異義駁不從公羊云祠兵故云祠兵者公羊字之誤因而作說文亦不從左氏說治兵為授兵於廟云於周司馬職曰仲夏教茷舍仲秋教治兵其下皆云如戰之陳仲冬教大閱修戰法虞人萊所田之野乃為之如是治兵之屬皆習戰非授兵於廟又無祠五兵之禮是以爾雅釋天云出為治兵尚威武也入為振旅反尊卑也言反尊卑者出則壯者在前者弱在後入則壯者在後者弱在前是以鄭此云振旅兵入收衆專於農也云四時各教民以其一焉者春教振旅夏教茷舍秋教治兵至冬大閱是各教民以一也

辨鼓鐸鐃之用

王執路鼓諸侯執賁鼓軍將執晉鼓師帥執提旅帥執鞶卒長執鐃兩司馬執鐸公司馬執鐃注鼓人職曰以

路鼓鼓鬼享以賁鼓鼓軍事以晉鼓鼓金奏以金鈇止

鼓以金鐸通鼓以金鐻節鼓鄭司農云辨鼓鐸鐻之

用謂鈇鐸之屬鐻讀如濁其源之濁鈇讀如謹哢之哢

提讀如攝提之提謂馬上鼓有曲木提持鼓立馬髦上

者故謂之提杜子春云公司馬謂五人為伍伍之司馬

也玄謂王不執賁鼓尚之於諸侯也伍長謂之公司馬

者雖卑同其號音義

辨如字劉方免反鐸直各反鐻直
角反鈇女交反賁扶云反將軍如

字本或作軍將提徒兮反鞞薄兮反鈇音征謹火
官反哢女交反攝提爾雅云太歲在寅曰攝提格疏釋

此春夏秋三時各教其一必春辨鼓鐸者鼓雷之類象
仲春雷發聲於外言辨鼓鐸錡鈇之用者此句與下文
為總目也注釋曰鄭引鼓人職者欲見鼓人有六鼓四
金據本各依所用今此所用或有不依本者以其唯賁
鼓鼓軍事是依本王執路鼓軍將執晉鼓等註不依本
用而在軍兼用也先鄭云辨鼓鐸錡鈇之用謂鈇鐸之
屬者按司馬灋云十人之長執鈇百人之帥執鐸千人
之帥執鼙萬人之主執大鼓義與此同故引之為證也
云錡讀如濁其源之濁者此讀取音同之義濁其源者
淮南子云濁其源其流不清故讀從之云鈇讀如讒
之唳者從毛詩云以謹讒唳云提讀如攝提之提者從
爾雅云寅為攝提格取音同而已云提謂馬上鼓者此
先鄭蓋據當時已有單騎舉以况周其實周時皆乘車
無輕騎灋也後鄭云王不執賁鼓尚之於諸侯也者按
鼓人職賁鼓鼓軍事計王在軍自為元帥自合執賁鼓
今不執賁鼓者見諸侯因朝而來與王為賓客故讓之

使執賁鼓故云尚之於諸侯王既不用賁鼓而用路鼓者以其雷鼓靈鼓祭天地之鼓不敢用故用祭宗廟之路鼓也軍將用晉鼓者是鼓金奏與之相應故也不用警鼓者鼓役事之鼓故不用云伍長謂之公司馬者雖卑同其號者按諸官大夫乃與大官同號宰夫已下并上士中士下士皆不得與大官同號今於序官大司馬之下上士得號行司馬及在軍二十五人長中士號兩司馬五人長下士號公司馬皆與大官同號者以司馬主軍軍事主嚴

雖卑得同號也 **以教坐作進退疾徐疏數之節**注習戰

灋音義

疏數音朔下注疏數同

疏

釋曰按下大閱禮備軍法虞人萊所田之野下又云中軍以鼙

令鼓鼓人皆三鼓已下有此坐作進退疾徐疏數之節彼大閱具言於此畧說有此坐作之法此於教戰之處為之故鄭云 **遂以蒐田有司表貉誓民鼓遂圍禁火弊**習戰法也

獻禽以祭社注春田為菟有司大司徒也掌大田役治
徒庶之政令表貉立表而貉祭也誓民誓以犯田灋之
罰也誓曰無干車無自後射立旌遂圍禁旌弊爭禽而
不審者罰以假馬禁者虞行守禽之厲禁也既誓令鼓
而圍之遂菟田火弊火止也春田主用火因焚萊除陳
草皆殺而火止獻猶致也屬也田止虞人植旌衆皆獻
其所獲禽馬詩云言私其縱獻肩于公春田主祭社者
土方施生也鄭司農云貉讀為禡禡謂師祭也書亦或

為禡音義

貉莫駕反注同契婢世反劉薄計反射食亦反下王射同縱子工反肩詩作斫音同施式

鼓反禡疏

釋曰按大閱禮遂以狩田以下云以旌為左右和之門羣吏各帥其車徒以叙和出左

右陳車徒有司平之既陳乃設驅逆之車有司表貉於陳前此亦當如彼但春非大備故亦畧言也言誓民者

即下大閱禮羣吏聽誓於陣前鄭引月令司徒北面誓之是也云鼓者即下文軍以鞞令鼓鼓人皆三鼓已

下是也云遂圍禁者既誓令鼓而圍之云火契者謂田止也云獻禽以祭社者此因田獵而祭非月令仲春祭

社也注釋曰云春田為蒐者蒐搜也春時鳥獸孚乳搜擇取不孕任者故以蒐為名云有司大司徒也者即大

司徒職云大田役治其徒庶之政令故知有司是大司徒也云表貉立表而貉祭也者此即詩及爾雅云類也

禡也師祭是也云誓民誓以犯田法之罰也者當司徒北面誓之時小子斬牲以左右巡陳也云誓曰無干車

無自後射者此據漢田律而言無干車謂無干犯他車
無自後射象戰陳不逐奔走又一解云前人已射中禽
後人不得復射彼又云無面傷之等象降者不逆擊之
云立旌遂圍禁者旌則下文大閱禮云旗居卒間者是
也云旌獎者獎仆也田止旌則仆云爭禽而不審者罰
以假馬者謂獲禽所奠之籌罰者謂效功時爭禽不審
即罰去其籌云禁者虞衡守禽之屬禁也者按山虞皆
云使地之民守其屬禁謂遮屬之禁不得非時入也若
然按地官川衡小田獵之所無厲禁之事故言衡者川
林或有與山澤連者則亦有厲禁之事故連言之也

中

夏教爰舍如振旅之陳羣吏撰車徒讀書契辨號名之
用帥以門名縣鄙各以其名家以號名鄉以州名野以
邑名百官各象其事以辨軍之夜事其他皆如振旅注

芟讀如萊沛之沛芟舍草止之也軍有草止之灋撰讀
曰莫莫車徒謂數擇之也讀書契以簿書校錄軍實之
凡要號名者徽識所以相別也鄉遂之屬謂之名家之
屬謂之號百官之屬謂之事在國以表朝位在軍又象
其制而為之被之以備死事帥謂軍將及師帥旅帥至
伍長也以門名者所被徽識如其在門所樹者也凡此
言以也象也皆謂其制同耳軍將皆命卿古者軍將蓋
為營治於國門魯有東門襄仲宋有桐門右師皆上卿

為軍將者也縣鄙謂縣正鄙師至鄰長也家謂食采地者之臣也鄉以州名亦謂州長至比長也野謂公邑大夫百官以其職從王者此六者皆書其官與名氏焉門則襄仲右師明矣鄉則南鄉甄東鄉為人是也其他象此云某某之名某某之號某某之事而已未盡聞也鄉遂大夫文錯不見以其素信於民不為軍將或為諸帥是以闕焉夜事戒夜守之事草止者慎於夜於是主別

其部職音義

茛蒲未反撰息轉反又仕轉反注音莫息
緩反沛步未反一音貝又普貝反數色主

反薄步古反後薄書皆放此識音志一音試下同朝直
遙反被皮偽反下同治直吏反比毗志反甄直偽反見

賢遍

疏

釋曰如振旅之陳者四時各教其一故春教振
旅夏教芟舍但設經不可文文具設故云如振

反旅之陳皆轉相如也云羣吏撰車徒者羣吏謂軍將至
伍長各有部分皆選擇其在車甲士三人步徒七十二
人之等云讀書契者書契謂兵士簿書之要契此小宰
之八成云師田以簡稽一也云辨號名者此帥以門名
已下是也注釋曰芟讀如菜沛之沛者按王制云居民
山川沮澤注云沮謂菜沛時俗有水草謂之菜沛故讀
從之也云芟舍草止之也者以草釋芟以止釋舍故即
云軍有草止之法云數擇之也者以解撰為數擇取其
善者云軍實之凡要者凡軍有三種或以俘因為軍實
或以戈盾弓矢為軍實或以禽牲為軍實今此所云軍
實者據兵器為軍實凡要即名籍之總名也云號名者
歲識者即上注三者旌旗之細者也云所以相別也者

皆綴之於膊上以別死者也云鄉遂之屬謂之名者言之屬即經云縣鄙是遂之屬從縣鄙至鄰里州是鄉之屬從州至比長故言之屬以總之云家之屬謂之號者謂都家之內從大夫至士云百官之屬謂之事者從王朝六卿已下至下士野以邑名鄭雖不言亦在鄉遂之例以其同是溝洫之人出軍出貢又等故知亦入名中也其號也名也事也三者據經而言云在國以表朝位者即覲禮云上介各奉其君之旗置於宮者是也云凡此言以也象也皆謂其制同耳者以謂若經云帥以門名已下至野以邑名已上五者皆言以也惟百官云象是以也象也此六者以象雖異其制則同皆小旌旗也云軍將皆命卿者欲解帥以門名之意止由卿居於國門使為軍將故軍將得以門為名云古者軍將蓋為營治於國門者此解軍將得以門為名者只由非常之急要在於門故使卿在門住而營治其門故也云魯有東門襄仲者按昭三十二年左傳云魯文公薨而東門遂

殺適立庶魯君於是乎失國公子遂字襄仲號為東門
只由居東門宋有桐門右師者按春秋左氏傳昭二十
五年春叔孫婁聘於宋桐門右師見之注云右師宋卿
樂大心也其室居桐門故曰桐門右師是宋有桐門右
師也引之證將帥得以門名之事經直云縣鄙鄭知鄰
長者以其在軍之時從遂大夫已下至鄰長皆在今畧
言縣鄙明皆有也云家謂食采地者之臣也者食采地
是公卿大夫其身在朝其臣在采地若公山弗擾之類
今隨主在軍故以其號為名也鄉以州名亦謂州長至
比長者亦如六遂自鄉大夫已下至比長皆在今畧舉
州為首也云野謂公邑大夫者謂為四等公邑若載師
職公邑自甸以出至五百里其長二百里三百里如州
長四百里五百里如縣正長下皆有屬官在軍者皆以
邑為名云百官以其職從王者謂三百六十官各以其
職事從王在軍若大宰下六十官隨其長從王皆以事
為號也云此六者皆書其官與名氏焉者六者謂經五

以一象假令為官則云大司徒下某官姓名某也云門則襄仲右師明矣者經直云帥以門名恐直以門為名不加官與名字諸官皆須名氏明門亦有官與氏名故云明矣云鄉則南鄉甌東鄉為人也是也者甌與為人皆當時鄉名故舉以為况云其他象此者此鄭畧舉門名與鄉名其他仍有縣鄙與家野百官亦依此而稱焉云某某之名者即經云門縣鄙鄉野四者皆是某某之名謂若門名當云桐門右師之下某官某姓某甲之名三者皆放此云某某之號者即經云家以號名是也謂若魯之費邑即云費邑之下某官某姓某甲之號云某某之事者即經云百官各象其事謂若地官之下則云大司徒之下某官某姓某甲之事云未盡聞也者鄉來所釋六者畧聞帥以門名鄉以州名舉以為况其餘未聞故云未盡聞也云鄉遂大夫文錯不見者此經六遂直云縣鄙不言遂六鄉言以州名雖見鄉亦不見鄉大夫之負其文交錯不見鄉遂大夫故云文錯不見也云以

其素信於民者兵書孫子云素信者與衆相得是也舊
素與民相信者必情義相得故鄉遂之官還使為軍吏
云不為軍將或為諸帥是以闕焉者管子云因內政寄
軍令則鄉遂大夫已下至此長鄰長皆因為軍吏以領
本民在上或別使人為軍將則鄉遂大夫別領人為師
帥旅帥以下經在軍吏帥以門名之內故闕鄉遂大夫
也必知有別使人為軍將法者見外傳穆叔云天子作
師公帥之以征不德詩曰周公東征四國是遑此竝上
公為軍將詩云韎韐有奭以作六師此乃諸侯世子為
軍將田獵亦容如此於是時鄉遂大夫則為諸帥也若
然按下文云師都載旌鄉遂載物注云鄉遂大夫或載
旌或載物衆屬軍吏無所將也者謂鄉遂大夫全無武
用則諸帥亦不為則是衆屬他軍吏已身全無所將故
或載旌或載物不載旗義與此不違也云於是主別其
部職者釋經以辨軍之夜事分遂以苗田如蒐之灋車
別其當部當職不與外交雜也

弊獻禽以享祔注夏田為苗擇取不孕任者若治苗去
不秀實者云車弊驅獸之車止也夏田主用車示所取
物希皆殺而車止王制曰天子殺則下大綏諸侯殺則
下小綏大夫殺則止佐車佐車止則百姓田獵祔宗廟
之夏祭也冬夏田主于祭宗廟者陰陽始起象神之在

內音義

祔餘若反孕羊證反去起呂反綏而誰反下同

疏

釋曰在教戰之處辨號名既訖遂入防行

苗田之法云如菟之法者如上菟時有司表貉誓民令
鼓遂圍禁之等云車弊及以享祔二者則與春異以其
春時火弊祭社此時車弊享祔也注釋曰以其春夏為
陽主其生長故春田為菟搜取不孕任者夏田為苗若

治苗去不秀實者其義但春時主孚乳故以不孕任解之也云車弊驅獸之車止也夏田主用車示所取物希者春秋左氏傳云彼徒我車懼其侵軼我也車行遲取獸少故知用車示取物希也引王制曰天子殺則下大綏已下據殺訖而言毛詩傳云天子發抗大綏諸侯發抗小綏者據始殺而言也云大夫殺則止佐車者王制注佐車驅逆之車按田僕云掌佐車之政設驅逆之車佐車似與驅逆之車別者但王制佐車與田僕驅逆之車為一其田僕佐車自是田車之貳曰佐佐文雖同其義則異也若然驅逆之車言佐者能逐禽故以佐言之云禘宗廟之夏祭也者大宗伯文云冬夏田主於祭宗廟陰陽始起象神之在內者仲冬一陽生仲夏一陰生是陰陽在內故神象之而行祭也此祭因田獵獻禽為祭若正祭自在五月

中秋教治兵如

振旅之陳疏

釋曰言教治兵者凡兵出曰治兵入曰振旅春以入兵為名春尚農事秋以出兵為

名秋尚嚴威故也云如振旅之陳者如春振旅時坐作進退疾徐疏數之法也

辨旗物之用王

載大常諸侯載旂軍吏載旗師都載旛鄉遂載物郊野

載旒百官載旒各書其事與其號焉其他皆如振旅注

軍吏諸軍帥也師都遂大夫也鄉遂鄉大夫也或載旛

或載物衆屬軍吏無所將也郊謂鄉遂之州長縣正以

下也野謂公邑大夫載旒者以其將羨卒也百官卿大

夫也載旒者以其屬衛王也凡旌旗有軍衆者畫異物

無者帛而已書當為畫事也號也皆畫以雲氣音義

音書

畫出注氣本
或作气同

疏

釋曰按下文注以出軍之旗則如秋則此經是在軍旌旗也云各書其事與其

號馬者此二者即是仲夏百官各象其事及號名之等
此秋雖不具辨號名亦畧舉之見四時皆有此物也云
其他皆如振旅者亦謂坐作進退疾徐之法如振旅之
陳也注釋曰云軍吏諸軍帥也者亦謂從軍將至下伍
長皆是軍吏也云師都遂大夫也鄉遂鄉大夫也者按
司常云孤卿建疆大夫士建物則鄉大夫是卿建疆是
其常師都載疆不嫌無鄉大夫故鄭直舉遂大夫也云
鄉遂鄉大夫者以其遂大夫是中大夫建物是其常今
鄉遂建物不嫌無遂大夫故鄭直舉鄉大夫也云或載
疆或載物衆屬軍吏無所將也者鄉遂大夫若為軍將
則在軍吏載旗軍中領衆來時亦載旗今載疆載物不
載旗故知已之所管之衆屬他軍吏已無所將以其已
無武用非直不為軍將亦不為諸帥故全無所將以是
載疆載物而已若然既不為軍吏遂大夫上得與卿同

載疆鄉大夫則是卿下得與大夫同載物也以鄉遂大夫掌衆同故同載物也俱兩載者以其不為軍將又不任鄉職卿大夫尊卑之常當載疆載物而已故容其兩載也云郊謂鄉遂之州長縣正以下也者郊內有六鄉州長已下郊外有六遂縣正已下故知言郊有此二等人也云野謂公邑大夫者按載師職云公邑之田任甸地郊外曰甸甸則郊外曰野故以野言之但公邑自甸以出至疆五百里有四等公邑皆有大夫治之故司馬法云二百里三百里如州長四百里五百里如縣正是公邑大夫也云載旒者以其將羨卒也者以其六鄉之內上剗致民一家一人為正卒其餘皆為羨卒六遂之內下剗致民家一人為正卒一人為羨卒其餘為餘夫正卒既屬軍吏其餘羨卒使此州長已下等不為軍吏者領之但公邑之內雖不見有出軍之法若出軍亦當與鄉遂同以其得為溝洫法故也若出軍亦正卒使大夫等為軍吏其餘羨卒亦使不為軍吏者領之云百官

卿大夫也載旗者以其屬衛王也者以其天地四時之卿大夫其屬各六十有選當行衛守王者即是有衆故載鳥隼之旗云凡旌旗有軍衆者畫異物者即經天子諸侯軍吏郊野百官是也云無者帛而已者鄉遂載禮物是也云書當為畫事也號也皆畫以雲氣者事即上百官言事號即上家言號不言名此亦有名文畧耳云畫以雲氣者鄭解經典言畫者皆以雲解之謂畫五色雲也

遂以獮田如蒐田之灋

羅弊致禽以祀禘注秋田為獮獮殺也羅弊罔止也秋

田主用罔中殺者多也皆殺而罔止禘當為方聲之誤

也秋田主祭四方報成萬物詩曰以社以方音義獮息淺反

禘音方出注皆殺如字劉色界反疏釋曰上文教戰班旗物訖遂入防

羅樊致禽以祀祊者秋田主用羅羅止田畢入國過郊之神位乃致禽以祀四方之神注釋曰云祊當為方聲之誤也者以祊乃是廟門外之西惟因祭宗廟及明日釋祭乃為祊祭今既因秋田而祭當是祭四方之神故云誤也云秋田主祭四方報成萬物者以秋物成四方神之功故報祭之云詩曰以社以方者詩小雅引之證方是四方之神也

中冬教大閱注春辨鼓鐸夏辨號名秋辨旗

物至冬大閱簡軍實凡頒旗物以出軍之旗則如秋以

尊卑之常則如冬司常佐司馬時也大閱備軍禮而旌

旗不如出軍之時空辟實音義

閱音悅
辟音避

疏

釋曰以冬時
農隙故大簡

閱軍實之凡要也注釋曰云春辨鼓鐸已下欲見春夏秋各教其一至冬大閱之時總教之故云至冬大閱軍

實云凡頒旗物以出軍之旗則如秋以尊卑之常則如冬司常佐司馬時也者以其王與諸侯所建秋冬同又秋云軍吏載旗師都載旌鄉遂載物郊野載旒百官載旗不言旌旌二者以其是出軍之法故不言道車游車所載大閱之時見尊卑之常故司常云孤卿建旌大夫士建物師都建旗州里建旗縣鄙建旒道車載旌游車載旌此為異也鄭云大閱備軍禮而旌旗不如出軍之時空辟實者大閱雖備禮是教戰非實出軍法是其空也秋教治兵治兵是出軍法故寄出軍之旗於彼是冬之空辟實出軍法者也趙商問巾車職建大麾以田注田四時田獵商按大司馬職四時皆建大常何鄭答曰麾夏之正色田雖習戰春夏尚生其時宜入兵夏本不以兵得天下故建其正色以春夏田至秋冬出兵之時乃建大常趙商又問巾車職曰建大白以即戎注云謂兵車司馬職仲秋辨其物以治兵王建大常注凡頒物以出軍之旗則如秋不知大白以即戎為何時答曰白

者殷之正色王即戎者或命將或勞師不自親將故建先王之正色異於親自將也

前期羣吏戒

衆庶修戰灋注羣吏鄉師以下疏

注釋曰言前期者謂若大宰職云前期十日

日此亦在教戰前不必要十日前也知羣吏鄉師以下者見鄉師職云凡四時之田前期出田法於州里簡其鼓鐸旗物兵器修其卒伍是其事也言鄉師以下則不及鄉鄉是鄉大夫則卿也則可及州長故州長職云若國作民而師田行役之事則帥而致之掌其戒令與其賞罰黨正云凡作民而師田行役則以其法治其政事族師亦云若作民而師田行役則合其卒伍簡其兵器以鼓鐸旗物帥而致是其以下之事也

虞人蒞

所田之野為表百步則一為三表又五十步為一表田

之日司馬建旗于後表之中羣吏以旗物鼓鐸鐃各

帥其民而致質明弊旗誅後至者乃陳車徒如戰之陳

皆坐注鄭司農云虞人萊所田之野芟除其草萊令車

得驅馳詩曰田卒沔萊玄謂萊芟除可陳之處後表之

中五十步表之中央表所以識正行列也四表積二百

五十步左右之廣當容三軍步數未聞致致之司馬質

正也弊仆也皆坐當聽誓音義

芟所銜反令力呈反下
令走同卒子恤反沔音

烏行戶剛反下行列

疏

釋曰虞人者若田在澤澤虞若

行陳皆同仆音赴

田在山地虞謂使其地之民於

可陳之處芟除草萊故云萊所田之野云為表百步則
一為三表者按下注引月令司徒北面以誓之此經云

司馬建旗於後表之中車徒皆坐則此於可陳之中從南頭立表以北頭為後表也注釋曰先鄭云虞人萊所田之野芟除其草萊令車得驅馳者謂芟除其田獵之處故云令車得驅馳引詩者證田處草萊按王制云昆蟲未蟄不以火田則仲冬之時放火田獵何須芟除草萊是以車攻詩毛傳云大艾草以為防然後焚而射焉是田處不得芟草萊故後鄭易之以為芟除可陳之處云後表之中五十步表之中央者謂從南表至北表云表所以識正行列也者於可陳之中央立此四表表兩相各有三軍之衆至表則闕一而坐坐而更起是表正行列也云積二百五十步者以三表之間有二百步又加一表五十步故總為二百五十步也云左右之廣當容三軍者天子六軍左右之地各容三軍此鄭據天子六軍整數而言其實兼羨卒之等故小司徒職云凡起徒役無過家一人惟田與追胥竭作鄭云國人盡行是非止六鄉之民六軍而已云步數未聞者但先南北二

百五十步東西不言步數故云未聞也云皆坐當聽誓者下文即云聽誓於陳前故先當聽誓也

羣吏

聽誓于陳前斬牲以左右徇陳曰不用命者斬之注羣

吏諸軍帥也陳前南面鄉表也月令季秋天子教于田

獵以習五戎司徒播朴北面以誓之此大閱禮實正歲

之中冬而說季秋之政於周為中冬為月令者失之矣

斬牲者小子也凡誓之大畧甘誓湯誓之屬是也音義

鄉許亮反播劉如字又音箭一音初疏釋曰云羣吏聽

洽反扑普卜反甘如字劉胡甘反誓於陳前者士

卒皆於後表北面坐羣吏諸軍帥皆在士卒前南面立以聽誓云斬牲以左右徇陳者從表左右向外以徇陳

注釋曰云羣吏諸軍帥者從軍將以至伍長謂象軍吏
建旗者也引月令者證所誓者是司徒使司徒誓者此
軍吏及士本是六鄉之民今雖屬司馬猶是已之民衆
故使司徒誓之也云此大閱禮實正歲之中冬者周雖
建子為正及其行事皆用夏之正歲則此經中夏中春
中秋中冬皆據夏法也云而說季秋之政於周為中冬
為月令者失之矣者呂不韋作月令以為此經中冬為
周之中冬當夏之季秋故說於季秋是失之矣按月令
季秋云是月也天子乃教於田獵以習五戎班馬政云
云注引中秋教治兵法王戴大常已下為證不云失至
此乃以月令是中冬教大閱法而言為月令者失鄭君
兩解之以其彼云司徒誓衆與此誓衆之等同故為大
閱彼為治兵法者以彼文授車以等級及命主祠祭於
四方文與中秋治兵者同故彼為治兵法也云斬牲者
小子也者小子職云凡師田斬牲以左右徇陳是也云
凡誓之大畧甘誓湯誓之屬是也者甘誓是啟與有扈

戰湯誓是湯伐桀誓衆辭言之屬
者仍有泰誓費誓之等故云之屬
中軍以鞀令鼓鼓人

皆三鼓司馬振鐸羣吏作旗車徒皆作鼓行鳴鐺車徒
皆行及表乃止三鼓攬鐸羣吏弊旗車徒皆坐注中軍
中軍之將也天子六軍三三而居一偏羣吏既聽誓各
復其部曲中軍之將令鼓鼓以作其士衆之氣也鼓人
者中軍之將師帥旅帥也司馬兩司馬也振鐸以作衆
作起也既起鼓人擊鼓以行之伍長鳴鐺以節之伍長
一曰公司馬及表自後表前至第二表也三鼓者鼓人

也鄭司農云掩讀如弄玄謂如涿鹿之鹿掩上振之為

掩掩者止行息氣也司馬法曰鼓聲不過闔鞞聲不過

闔鐸聲不過琅音義

掩音鹿李扶表反鐸待洛反涿丁角反沈音濁劉音獨闔吐剛反闔

吐獵反劉湯疏

釋曰此經總說聽誓既已將欲向南第

荅反琅音郎二表象戰陳初發面敵此即仲春振旅疾徐坐作之事一也注釋曰中軍中軍之將也者此六

軍三軍居一偏皆自有中軍也是以鄭云天子六軍三

三而居一偏也言三三者非謂如算法云三三而九者

直是兩箇三為三而復三而已也云羣吏既聽誓命各

復其部曲者軍吏本各主其部分曲別謂若伍長主五

人兩司馬主二十五人卒長主百人等皆是部曲至

於誓之時出向衆前聽誓訖各復其部伍本處故云復

其部曲也云中軍之將令鼓者經云中軍以鞞令鼓故

知中是中軍之將也云鼓以作其士衆之氣者春秋左氏傳曹劌云一鼓作氣再而衰三而竭是鼓以作士衆之氣也云鼓人者中軍之將帥旅帥也者按成二年左傳晉與齊戰于鞏郟克傷於矢曰余病矣張侯曰師之耳目在吾旗鼓進退從之於是右援枹而鼓之時郟克擊鼓哀二年左傳鐵之戰趙簡子云伏弋嘔血鼓音不衰是皆將居鼓下知兼有帥帥旅帥者按上文春辨鼓鐸云軍將執晉鼓帥帥執提旅帥執鞞皆是鼓人故知是軍將帥帥旅帥也其卒長執銜已下皆金非鼓也云司馬兩司馬也者以其上文云兩司馬執鐸故此經云司馬振鐸者是兩司馬也云以作衆者金雖非鼓振之者亦是以作衆也云作起也既起鼓人擊鼓以行之者釋經車徒皆作鼓行云伍長鳴鐸以節之者上文云司馬執鐸鼓人職云金鐸節鼓故云伍長鳴鐸以節之也云伍長一曰公司馬者上文云公司馬執鐸是伍長故云一曰公司馬也先鄭云攬讀如弄者直以

據弄聲相近以振鐸謂之弄也。玄謂如涿鹿之鹿者，謂從史記黃帝與蚩尤戰於涿鹿之鹿，直取音同，不從義也。此是鹿鹿然作聲也。云掩上振之者，以手在上，向下掩而執之。云止行息氣也者，按鼓人云：金鐸通鼓，金鐃止鼓，則金鐸是通鼓，而云止行息氣者，見經云：振鐸，即云羣吏弊旗，故知金鐸亦得止行息氣也。司馬法：鼓聲不過闔，以下者證鼓聲與鐸聲之有異也。又三鼓振鐸作旗，車徒皆作鼓進。

鳴鐸車驟徒趨及表乃止坐作如初。注：趨者赴敵尚疾之漸也。春秋傳曰：先人有奪人之心，及表自第二前至。

第三音義

驟在救反。劉才疏注釋曰：昭二十一年冬十

邁反。先悉薦反。

疏

月華登以吳師救華氏。宋

厨人濮曰：軍志有之。先人有奪人之心。注云：戰氣未定，故也。後人有待其衰。注云：待敵之衰，乃攻是其事也。

乃鼓車馳徒走及表乃止注及表自第三前至前表鼓

戒三闕車三發徒三刺注鼓戒戒攻敵鼓壹闕車壹轉

徒壹刺三而止象服敵音義

闕苦穴反

疏

注釋曰經并言三闕三發三刺鄭歷

言鼓一闕車一轉徒一刺三而止者鄭據實而言非是一時而三故也

乃鼓退鳴銑且卻

及表乃止坐作如初注銑所以止鼓軍退卒長鳴銑以

和衆鼓人為止之也退自前表至後表鼓鐸則同習戰

之禮出入一也異者廢鐸而鳴銑音義

卻起畧反和胡取反為于偽反

下為相疑同疏 釋曰此言乃鼓退者謂至南表軍吏及士卒回身向北更從南為始也云鳴銑且卻者此

鳴銑且卻據初至南表退軍之時象在軍軍退亦鳴銑
是以左氏哀公艾陵之戰陳子云吾聞鼓不聞金亦是
鳴銑退軍法及其向北即更為習戰之事故云及表乃
止坐作如初故鄭云習戰之禮出入一也注釋曰云銑
所以止鼓者鼓人職云金銑止鼓是也知卒長鳴銑者
春辨鼓鐸云卒長執銑是也云退自前表至後表者經
畧言表則及表乃止坐作如初者總向北三表故鄭云
自前表至後表也云鼓鐸則同者鼓人三鼓兩司馬執
鐸與向南時同以其習戰之禮出入一也云異者廢鐸
而鳴銑者前向南時云鼓行鳴鐸此北向不言鳴鐸而
言鼓退鳴銑以其雖習戰出入一也

之門羣吏各帥其車徒以叙和出左右陳車徒有司平
之旗居卒間以分地前後有屯百步有司巡其前後險

野人為主易野車為主注冬田為狩言守取之無所擇

也軍門曰和今謂之壘門立兩旌以為之叙和出用次

第出和門也左右或出而左或出而右有司平之鄉師

居門正其出入之行列也旗軍吏所載分地調其部曲

疏數前後有屯百步車徒異羣相去之數也車徒畢出

和門鄉師又巡其行陳鄭司農云險野人為主人居前

易野車為主車居前音義

分扶問反又如字注同易以政反注同壘力執反

疏

釋曰此一節總論教戰訖入防田獵之事故云遂以狩田也云以旌為左右和之門者六軍分三軍各處東西

為左右各為一門云以叙和出者以教戰處內故以田處出云旗居卒間者軍吏各領已之士卒執旗以表之故旗居卒間也注釋曰云冬田為狩言守取之無所擇者對春夏言蒐言苗有所擇又秋名獮中殺者多對此圓守之此又多於獮故得守名也云軍門曰和者左氏傳云師克在和不在衆田獵象戰伐故其門曰和門也云今謂之壘門者漢時軍壘為門名曰壘門與古和門同故舉為說云立兩旌以為之者昭八年穀梁傳云秋蒐於紅正也又云刈藺以為防置殪以為轅門以蒐覆實以為藜注云實椹也藜門中臬又云流旁握御擊者不得入注流旁握謂車兩轆頭各去門邊空握握四寸也又車攻詩傳云大艾草以為防或舍其中禍纏旃以為門裹纏質以為藜門容握驅而入擊則不得入左者之左右者之右然後焚而射焉又云古者戰不出頃田不出防是其事也云有司平之鄉師居門正其出入之行列也者按鄉師職云巡其前後之屯而戮其犯命者

斷其爭禽之訟故知此經云有司皆是鄉師也云車徒異羣者出軍之時一車甲士三人步卒七十二人車徒同羣今在軍行列之時則既陳乃設驅逆之車有司表

貉于陳前注驅驅出禽獸使趨田者也逆逆要不得令

走設此車者田僕也音義驅起具反又如疏釋曰前經字要於逆反

訖故此云既陳云乃設驅逆之車設訖即為表貉之祭於陳前也注釋曰云驅驅出禽獸使趨田者按王制云天子發諸侯發皆不云佐車者其實天子諸侯田時皆有驅逆之佐車直於大夫言之者據終而言也知設此車是田僕者見田僕職云設驅逆之車故知也

中軍以鼙令鼓鼓人皆三鼓羣

司馬振鐸車徒皆作遂鼓行徒銜枚而進大獸公之小

禽私之獲者取左耳注羣司馬謂兩司馬也枚如箸銜
之有繡結項中軍法止語為相疑惑也進行也鄭司農

云大獸公之輸之於公小禽私之以自畀也詩云言私

其縱獻肩于公一歲為縱二歲為貳三歲為特四歲為

肩五歲為慎此明其獻大者於公自取其小者玄謂慎

讀為麋爾雅曰豕生三曰豮豕牝曰豮麋牝曰麋獲得

也得禽獸者取左耳當以計功音義

箸直慮反繡戶卦反劉又胡麥反或

音卦畀必二反與也貳音巴本亦作巴慎如字亦音辰麋音辰又音腎止尸反麋麋牝也豮本亦作縱子工反

疏

釋曰此今鼓之事與上文教戰時大同惟徒銜枚為異注釋曰鄭知羣司馬謂兩司馬者上文春辨鼓鐸

云兩司馬振鐸故知之也云枚如箸銜之有纒結項中

者雖無正文以意言之纒即兩頭繫也既有兩繫明於

項後中央結之先鄭引詩云言私其鞶獻肩于公一歲

為鞶已下鄭皆不從者幽詩毛傳云三歲曰斨此云四

歲為肩爾雅云豕生一曰特二曰師三曰鞶又爾雅云

麋牝曰麋無五歲為慎又魏詩云三歲曰特先鄭皆無

可依據故不從也若然斨

還是鹿之絕有力者也

及所弊鼓皆駘車徒皆譟注

鄭司農云及所弊至所弊之處玄謂至所弊之處田所

當於止也天子諸侯蒐狩有常至其常處吏士鼓譟象

攻敵尅勝而喜也疾雷擊鼓曰駘譟謹也書曰前師乃

鼓鼗譟亦謂喜也音義

駘本亦作駘胡楷反李一音亥譟素報反鼗音符又芳甫反

疏

釋曰云及所弊者各徒弊止之處謂百姓獵止注釋曰引書曰者書傳文彼說武王伐紂時事

徒乃

弊致禽饁獸于郊入獻禽以享烝注徒乃弊徒止也冬

田主用衆物多衆得取也致禽饁獸於郊聚所獲禽因

以祭四方神於郊月令季秋天子既田命主祠祭禽四

方是也入又以禽祭宗廟音義

饁于輒反劉于法反烝之升反後皆倣此疏

釋曰云致禽饁獸于郊者亦謂因田過郊之神位而饋之注釋曰月令季秋天子既田云云者證彼祭禽于四

郊與此饁獸于郊為一物其實彼一及師大合軍以行

解以為是仲秋祭禽以祠禘為一也

禁令以救無辜伐有罪注師所謂王巡守若會同司馬

起師合軍以從所以威天下行其政也不言大者未有

敵不尚武音義

從才用反下同

疏

注釋曰云師所謂王巡守若會同者以對下文云若大師

是出軍法故鄭云未有敵不尚武也

若大師則掌其戒令涖大卜帥執事

涖豐主及軍器注大師王出征伐也涖臨也臨大卜卜

出兵吉凶也司馬法曰上下謀是謂參之主謂遷廟

之主及社主在軍者也軍器鼓鐸之屬凡師既受甲迎

主于廟及社主祝奉以從殺牲以血塗主及軍器皆神

之疏

釋曰云帥執事泄釁主及軍器者按小子職云釁邦器及軍器彼官釁之而大司馬臨之注釋曰鄭

知臨大卜者按大卜云掌龜之八命一曰征故知也云司馬法曰上下下謀是謂參之者卜在廟又龜有神故

云上下謀人在下故云下謀君居其中故云參也云主謂遷廟之主及社主在軍也者曾子問云軍行則以遷

廟之主行左傳祝佗云軍行被社釁鼓祝奉以從尚書云用命賞於祖不用命戮於社皆是在軍者也及

致建大常比軍衆誅後至者注比或作庀鄭司農云致

謂聚衆也庀具也玄謂致鄉師致民於司馬比較次之

也音義

比必履反注同或毗志反劉方吉反疏注釋曰庀匹是反劉芳美反具也沈方二反先鄭云

庀具也者先鄭從古書庀後鄭不從以為校次者凡物有數者皆須校次乃知具不故不從具也玄謂致鄉師

致民於司馬者據鄉師職知之其司馬用王大常者以上文大師王親御六軍故司馬用王之大常致衆若王不親則司馬自用大旗致之

及戰巡陳眠事而賞罰注事謂戰功也

音義

眠音視

疏

釋曰巡陳者司馬當戰對陣之時巡軍陳眠其戰功之事知其有功無功而行賞罰

也若師有功則左執律右秉鉞以先愷樂獻于社注功

勝也律所以聽軍聲鉞所以為將威也先猶道也兵樂

曰愷獻于社獻功于社也司馬法曰得意則愷樂愷歌

示喜也鄭司農云故城濮之戰春秋傳曰振旅愷以入

于晉音義

鉞音越道音導濮音卜

疏

釋曰云若師有功則左執律右秉鉞以先者謂戰陳知有

勝功訖乃執律者示此律聽軍聲尅勝耳右秉鉞示威也注釋曰云律所以聽軍聲者大司職云彼初出軍時大司執聽至此尅勝司馬執之先鄭引城濮之戰者僖二十八年晉文公敗楚於城濮兵入曰振旅整衆而還歌愷樂而入晉彼諸侯法與此天子禮同故引為證也趙商問夏官師有功則獻於社春官大司樂王師大獻則令奏愷樂注云大獻獻捷於祖不達異意鄭答曰司馬主軍事之功故獻於社大司樂宗伯之屬宗伯主宗廟故獻於祖若燕軍有功二處俱獻以其

若師不功則

厭而奉主車注鄭司農云厭謂厭冠喪服也軍敗則以

喪禮故秦伯之敗於殽也春秋傳曰秦伯素服郊次鄉師而哭玄謂厭伏冠也奉猶送也送主歸於廟與社音

義

厭於涉反李一音於入反注同

疏

注釋曰春秋秦伯

殺戶交反劉音豪鄉許亮反
年秦師襲鄭之事按彼僖三十年秦晉圍鄭鄭使燭之
武說秦伯秦師退使杞子逢孫楊孫戍鄭至僖三十
年秦使孟明視白乙丙西乞術襲鄭將至鄭逢商人弦
高將市於周詐之秦師還至殺晉師與姜戎敗之獲三
帥囚之於晉晉舍三帥還秦伯素服郊次鄉師而哭之
是其事也玄謂厭伏冠也者按下曲禮云厭冠不入公
門彼差次當總小功之冠以義言之五服之冠皆厭以
其喪冠反吉冠吉冠於武上向內縫之喪冠於武下向
上縫之以伏冠在武故得厭伏之名按檀弓注厭冠喪
冠其服亦未聞若然先鄭引秦伯素服者彼據在國向
外哭此則從外向內不同故云其服未聞
後鄭不破者已有檀弓注此從破可知

王弼勞士庶

子則相注師敗王親弔士庶子之死者勞其傷者則相

王之禮庶子卿大夫之子從軍者或謂之庶士音義

勞

報反注同相

疏

注釋曰按宮伯云掌宮中士庶子注云士適子庶子其支庶與此注云庶子為

息亮反注同

卿大夫之子適庶俱兼則經中士為卿大夫士之身與

宮伯注不同者彼宮正掌卿大夫士身宮伯別掌士庶

子士庶子為適子支子明矣此惟一文云弔勞士庶子

不見別有弔勞卿大夫士身故分之鄭望經為注故不

同也若然此注不云士之子者以其卿大夫之適子為

王與后與士同故親弔勞之士之子如衆人不得為王

及后如士故

大役與慮事屬其植受其要以待攷而賞

不弔勞之也

誅注大役築城邑也鄭司農云國有大役大司馬與謀

慮其事也植謂部曲將吏故宋城春秋傳曰華元為植

巡功屬謂聚會之也。要者簿書也。攷謂考校其功。玄謂

慮事者封人也。於有役司馬與之植築城植也。屬賦丈

尺與其用人數音義

與慮音預。又如字注與謀同。屬音燭。注同植直吏反。注同華戶化反。

植音貞

疏

釋曰此謂築城邑之時封人慮事計功大司馬雖不掌徒役亦得與謀也。屬其植者屬謂屬聚

徒役計其人數賦其丈尺以課其功也。植者版幹之屬計其人數各使備足也。注釋曰先鄭以為與慮事大司

馬與在謀慮其事中後鄭從之。增成其義。按宣十一年楚令尹為艾獵城沂使封人慮事以授司徒。注云封人

司徒之屬官是封人慮事司馬與在謀慮中也。春秋宋華元者按宣二年左氏傳云宋城華元為植。巡功注云

植將主也。先鄭云植謂部曲將吏屬謂聚會之後鄭不從以為植築城植也。屬賦丈尺與其用人數者按昭三

十二年晉士彌牟營成周計丈數揣高卑度厚薄仞溝
洫又云以令役於諸侯屬役賦丈又宣十一年計慮用
人功之數以此知屬大會同則帥士庶子而掌其政令
謂賦丈尺與人數也

注帥師以從王疏

注釋曰知帥師以從王者按諸子職云若會同賓客作羣子從注云從從

王是其若大射則合諸侯之六耦注大射王將祭射于
事也

射宮以選賢也王射三侯以諸侯為六耦疏

釋曰王大射之時有

諸侯來朝在京師者大司馬令之為六耦注釋曰云大射王將祭射於射宮以選賢也者按禮記射義云古者天子之制諸侯歲獻貢士於天子天子試之於射宮而中多者得與於祭大射禮亦射於郊學宮中皆是為祭選士故云選賢也云王射三侯者司表云王大射則共虎侯熊侯豹侯是也此大射是將祭而射故用諸侯為

六耦若賓射射人亦用六耦但不用諸侯當用卿大夫為之燕射三耦自然用卿大夫已下為之

大祭

祀饗食羞牲魚授其祭注牲魚魚牲也祭謂尸賓所以

祭也鄭司農云大司馬主進魚牲音義

食音嗣後饗食皆放此

疏

釋曰大祭祀謂天地宗廟此大祭據宗廟而言其中小之祭祀亦為之矣饗食謂諸侯來朝上公三饗三食之等行之在廟故與大祭祀同皆羞進魚牲注釋曰云祭謂尸賓所以祭也者大祭祀授尸祭饗食授賓祭祭者魚之大鬻即少牢下篇云尸俎五魚侑主人皆一魚加臠祭於其上臠謂魚之反覆者公食大夫亦云授賓祭故云祭謂尸賓所以祭若王祭則膳夫云授王祭是也先鄭云大司馬主進魚牲者必使司馬進之者司馬夏官夏陰氣所起魚水物亦

大喪平士大夫注鄭司農云

平一其服也。玄謂平者正其職與其位。疏

釋曰必使司馬平之者司

馬之屬有司士主羣吏。今王喪不得使司士故司馬平之。注釋曰先鄭云平一其服也者後鄭不從者小宗伯

已懸衰冠故後鄭以為喪祭奉詔馬牲注王喪之以馬平者正其職與其位也。

祭者蓋遣奠也。奉猶送也。送之至墓告而藏之。音義

奠遣

棄戰反後遣奠遣車之類皆同。疏

注釋曰鄭知喪祭是大遣奠者以其喪奠反虞卒哭喪祭之等無奉送詔

告惟有大遣奠入壙之時有奉送之事故知喪祭是大遣奠耳。

周禮注疏卷二十九

周禮注疏卷二十九考證

大司馬施貢分職注職謂賦稅也○賦一本作職言因
職而有稅也故疏引大宰九職當從之

乃以九畿之籍疏此蠻服與大司徒云要服亦一也○
司徒二字疑行人之訛以大司徒無要服之文而大
行人有之也

又五千里為界者兩面相距則方萬里此則易之一
君二民之地○臣宗楷按易之一君二民之地八字

不可解當作據其一面而言之也而傳寫誤耳

以教坐作進退疏下又云中軍以鞶令鼓○鞶監本訛作舉今考下經正之

遂以苗田疏案田僕云掌佐車之政○監本脫政字今考經文補之

辨旗物之用疏故司馬法云二百里三百里如州長四百里五百里如縣正○監本脫三百里三字補之遂以獮田如菟田之灋○石經無下田字

疏以祊乃是廟門外之西○廟門外之西五字監本訛作廟門之外內今考郊特牲注文正之

前期羣吏戒衆庶疏言鄉師以下則不及鄉鄉是鄉大夫則卿也○鄉是二字疑大夫之訛

中軍以鞶令鼓疏哀二年左傳鐵之戰○二訛三今据左傳改正

乃鼓退疏是以左氏哀公艾陵之戰○艾陵之戰監本訛作鐵之戰今考左傳改正

中軍以鼙令鼓疏魏詩云三歲曰特○臣浩按此係毛傳之文魏詩下當增毛傳二字


大祭祀疏尸俎五魚侑主人皆一魚○此二句監本訛作主人主婦尸侑客各一魚今考有司徹經文改正

周禮注疏卷二十九考證

謹案第十一頁後二行疏鼓人職刊本職訛執據
鄭注改

第二十頁後三行疏詩小雅引之刊本小說大今
改

第二十一頁前二行疏軍吏載旗刊本載訛建今
改



覆校官編修臣劉種之

校對官編修臣李光雲

謄錄監生臣陳葆光